

Legreza e solidarietà per la scolina

I Paicenadores da Vich à endrezà na bona marena, compagnèda da musega gustegola, per tirèr sù scioldi per la Scolina de Sèn Jan

Solidarietà - L'è passà 60 egn da canche la belota Scolina de Sèn Jan é stata fata sù. N muie de nos se à mateà e à passà n toch de sia vita te anter chi parees. Ades, però, l'è besegn de meter a post chesta struttura, amò belota ma semper manco bona de ge dèr alberch te la miora maniera ai picoi bec de Sèn Jan. Canche Alessandra Cloch, presidenta de la Scolina, à fat a saer chest gran besegn, l'è scomenzà na "garejèda de solidarietà", descheche la presidenta enstessa l'ha chiamèda: n muie de sociazions o gropes à endrezà evenc per binèr ensema scioldi da destinèr a chest obietif.

Una de chesta scomenzadives se à tegnù en domenìa ai 8 de messèl sun Pianotui, n picol pian te mez al bosch sora Vich. I promotores de chest event l'è stat i Paicenadores da Vich, n grop de 8 joegn che acà 7 egn se à pascionà a la curiosa tradizion del "paicenèr" che vegn cà dal todesch, ma che aboncont troa na bona compatibilità co la tradizion de noscia val.

Per la manifestazion i Paicenadores à troà sostegn tant tel grop de la volontadives da Vich, che à enjgnà na bona marena e de golousa fortaes per duc, che te la copratives e boteighes che à fat n bon priesc per duta la magnadiva.

N auter segn de bon cher l'è ruà da "FassaXLive", n grop musical nasciù chest'aisciuda da 4 pascioné de musega tant folk che moderna: Nicola, Marco, Ferruccio e Diego. Chisc sonadores i à recognosciù l'importanza de la cauja e i à azetà



de viventèr la festa senza voler nia, e ence se chesta l'era la pruma outa che i sonèa dedant a la jent, duc à aprijià sia musega piagegola.

Dut i vadagn ciapà sù da la festa è stat destinà al restrutturazion de la Scolina de Sèn Jan.

Ence la presidenta Alessandra Cloch à tout pèrt a la festa: l'ha ringrazià de cher duc chi che se à dat jù per chest bel event e l'ha sottrissà la gran vejinanza che te chisc meisc l'ha sentù da duta la comunanza, che la se à dat la mans dintorn per sostegnir i lurieres per chest frabicat tant emportant per duc. La scolina, enfati, l'è dassen un di maores zentres per l'miorament e l'evoluzion de n paìse, ajache i bec l'è nosc davegnir e l'è nosc doer rencurèr i lesc olache chisc picoi passa gran pèrt de sie temp e che donca contribues a sia formazion.

Valentina Ghetta



Momenc de la festa endrezèda dai Paicenadores de Vich sun Pianotui.